

廣德州志

卷二十四之卷二十六

鄉飲 賓興
講約 迎春
風俗 節序
守令

九

廣德州志卷二十四

典禮志 鄉飲 賓興 講約 迎春 風俗

鄉飲

鄉飲酒禮

欽定學正全書開載京府及直省府州縣每歲於正月十五日十月初一日舉行鄉飲酒禮直省州以知州爲主縣以知縣爲主教職爲司正生員贊禮讀法擇鄉里之年高有德者一人爲賓次爲介又次爲眾賓前一日執事者於儒學之講堂陳設坐次司正率執事諸生習儀

廣德州志

卷二十四

鄉飲

一

至日黎明執事者宰牲具饌主人及僚屬司正先詣學遣人速賓賓至主人率僚屬出迎於庠門之外揖入主居東賓居西三讓三揖而後升堂東西相向立贊兩拜賓坐介至如前儀既就位執事者贊司正揚觶引司正由西階升北面立贊賓介以下皆立贊揖司正揖賓介以下皆揖執事者以觶酌酒授司正司正舉酒曰恭惟朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序兄弟恭睦睦宗族外和鄉里無或廢墜以忝所生讀畢執事者贊

司正飲酒飲畢以觶授執事執事者贊揖司正揖賓介以下皆揖司正復位賓介以下皆坐贊讀律令執事者舉律令案於堂之中引讀者詣案前北面立贊賓介以下皆立行揖禮如前讀律令曰律令凡鄉飲酒序長幼論賢良年高有德者居上其次序齒列坐有過犯者不得干與違者罰以違制失儀則揚觶者以禮責之讀畢復位贊供饌執事者舉饌案至賓前次介次主以下各以次舉訖執事者贊獻賓主起席北面立執事者酌酒授主主受爵詣賓前置於席稍退贊兩拜賓答拜訖主

退復位贊賓酬酒賓起執事者酌酒授賓賓受爵如前儀訖各就位坐執事者以次酌酒獻介及眾賓徧賓主以下酒三行供羹執事者以次酌酒飲酒供饌三品畢贊徹饌候徹饌案畢贊賓主以下皆行禮主人司正居東賓介眾賓居西贊兩拜訖贊送賓以次下堂分東西行仍三揖出庠門而退

賓興 附入學

賓興禮每逢鄉試之年知州於七月上中二旬內擇吉餞送科試優等生員赴省應試十日前遣人送柬訂期屆期會僚屬於節愛堂俱蟒袍補服生員俱公服既至各三揖吏目安席丹墀下命優人做鹿鳴遺意奏曲數闋迨徹饌仍各三揖優人於儀門內張設綵幔作月宮形扮嫦娥一侍女一手執桂叢候生員從月宮過各以一枝予之既徧知州率僚屬送至西門外濯纓橋畔各飲以三爵飲徧生員畢行知州與僚屬乃反

廣德州志

卷二十四

賓興

三

附入學

歲科試新進儒童諸生候學憲紅案到擇吉入學屆期諸生之父兄敬具書啟請於知州知州蟒袍補服出堂諸生俱雀頂公服北面三揖候唱名給花紅給徧東西分列飲酒酒三巡北面四拜拜畢諸生仍分東西對向三揖齊下階先詣

文廟前候知州率謁

至聖先師於丹墀下行三跪九叩首禮禮畢齊赴明倫堂迎師既至知州讓教職西向已東向行交拜禮教職復

讓州守西向巳東向禮如前諸生乃北面謁師四拜畢
拜謝知州先出諸生之父兄乃向教職行拜謝禮又向
知州行拜謝禮禮畢陳設酒筵丹墀下優人奏曲俟徹
饌各三揖教職及諸生之父兄送知州出庠門諸生之
父兄又送教職回署於是各退 建平縣同

附建平縣賓興條款

一經理賓興出入賬目由城鄉公正紳士請示選諭叁年壹更

一鄉試賓興在金陵給發量人數之多寡按支派給

一鄉試中式文武舉人酌給花紅洋錢叁拾圓

一舉人會試文酌給賓興洋錢叁拾圓武酌給賓興洋

錢貳拾圓

一優拔副貢生酌給花紅洋錢拾伍圓

一優拔貢生朝考酌給賓興洋錢貳拾圓

廣德州志

卷二十四

賓興

五

一鄉試錄科遺落者酌給賓興半資

一會試中式文武進士酌給花紅洋錢肆拾圓

案此款係光緒元年建平紳士戴名賢等稟請縣令

方准於士民墾熟田畝每畝捐錢七文除民欠外

共收錢壹千千置買市房一所收租作為土著士子

鄉會試賓興之費

市房坐落東門舖坐南朝北東至饒姓北至大街西至饒姓南至巷基向東邊北至鍾周二姓第三進市房又至饒姓第二進市房東至高黃二姓屋南至巷向西邊北至饒姓第四進天井併王江二姓第四進屋西至書院公屋南至巷

講約

朔望日知州出諭講約

或每月一舉行
或間月一舉行

於天壽寺大殿

恭設

聖諭牌丹墀下東西對築講臺二座知州會同都司各率僚屬朝服行三跪九叩首禮分文武西坐班宣講生

恭詣

龍亭前請

聖諭登臺通贊生贊鳴講鼓開書案講

聖諭俟鳴鼓畢宣講生抽講三條通贊生贊讀律宣講生

廣德州志

卷二十四

講約

六

抽讀兩條贊宣揚畢講生下臺各官退班

案州境四鄉各保舊着約正約副亦於里社講約明

嘉靖六年知州龍大有立石州前

國朝順治九年設立鄉約申明

欽定六諭文康熙九年頒

上諭十六條十八年浙江巡撫輯爲直解繕冊進呈通行

直省督撫照依奏進鄉約全書刊刻各款分發府州

縣鄉村通行講讀雍正二年益以

聖諭廣訓萬言乾隆元年并將

欽定條律刊布曉諭仍令州縣各官董率約正值月勤爲

宣講州厯奉憲知照遵行故自天壽寺宣講外各鄉

俱於里社講約今里社講約之禮廢鄉氓或聞州守

出諭競來城於天壽寺聽講焉

附蒙欽差總理糧儲兼巡撫應天等府地方都察院
抄都御史陳案驗備仰本州遵照洪武禮制每里建
立里社壇場一所就查本處淫祠寺觀毀爲之不
必勞民傷財仍行令該當年里長自嘉靖五年二
月起每遇春秋二社出辦猪羊祭品依式書寫祭文
率領一里人戶致祭五土五穀之神務在誠敬豐潔
用虔祈報祭畢就行會飲并讀抑强扶弱之詞成禮
而退仍於本里內推選有齒德者一人爲約正有德
行者二人副之照依鄉約事宜置立簿籍二扇或善

廣德州志

卷二十四

講約

七

或惡者各書一籍每月朔一會務在勸善懲惡興禮
恤患以厚風俗鄉社既定然後立社學設教讀以訓
童蒙建社倉積粟穀以備凶荒而古人之所謂良法
美意率於此乎寓焉果能行之則雨暘時若五穀豐
登而賦稅自充禮讓興行風俗淳美而獄訟自簡何
待於催科何勞於聽斷而水旱盜賊亦何足慮乎此
敦本尚實之政良有司者自當加意舉行不勞催督
各將領過鄉約本數建立過里社處所選過約正約
副姓名備造文冊各另徑自申報以憑查考其舉之
有遲速行之勤惰而有司之賢否於此見焉定舉行
案別勸懲決不虛示等因奉此除遵奉外今將備六
年正月吉日立石

迎春 附勸農

立春前一日設勾芒神像併春牛像於東郊知州率僚屬朝服出迎反鎖頭門及抵神前陳祭品致祭行二跪六叩首禮祭畢並詣演武廳後廡換蟒袍補服知州出廳書吏班役以次跪參又選童子四人扮風調雨順四神像至廳前作婆娑狀少頃知州暫退俟廳上列酒筵官僚乃偕出吏目安各官席酒旣行優人奏陽春之曲輿夫先以綵亭舁勾芒神像入城官僚繼之至迎春橋皂隸請匙鑰速詣治前開頭門於儀門首陳設香案安

芒神及春牛官僚至向神再揖次日立春時刻各官仍穿蟒袍補服詣神前行二跪六叩首禮鼓人跪捧鼓請擊鼓三聲知州擊鼓畢偕僚屬脫補服撩蟒袍手執綵鞭繞春牛者三匝各舉三鞭而退

附勸農

每歲春季農務初興知州下鄉勸農日行一鄉四日而徧先擇鄉之大村落併當往來之衝可以聚會各村氓庶者爲勸所知州出役人擔花酒等物以隨旣至設步障几案知州南向坐集農夫牧豎於前諭以務勤而毋

情諭畢令執事者各簪以花飲以酒食以饅首給以油
扇眾等拜謝或有採桑採茶者賞亦如之歸途見有力
田而未及領賞者卽爲補給

風俗 節序附

宋潘說記廣德軍禹貢揚州之域也在昔秦并戰國是居
鄆郡唐有天下乃領桃州圖牒雖存井邑屢改寡魚鹽
之利以聚生齒罕林澤之饒以輸公上加之亂離相踵
草創斯甚好辭少信因而復舊輕死易發習以為常我
朝開基茲土建壘腴地兼倍珍物旁極結宇萬象從茲
宏敞百廛於焉走集被服寬舒盡去乎輕揚之俗舞蹈
參辰中興乎佳麗之地 天聖九年祠山廟記見事要

明一統志力於田畝不務商賈 漢地理志民淳事簡號江東道

廣德州志

卷二十四 風俗

十

院 桐汭志境大壤沃食貨富穰 曾鞏鼓角樓記喜事鬼神 郡志

萬厯志舊志云 案此舊志當指宏治嘉靖二志而言人性

直而好義俗信巫而尚鬼君子業儒術而尚質樸小人
崇節儉而力農桑婦女少出戶闕富貴不服綺羅女多
溺死男長出分其民喜迎神賽會桐雖僻處山郡而彬
彬質有其文先輩典型猶及見之

楊志吉禮若納采納徵諸儀不遵家禮率以儀文繁麗相
高男不親迎無奠雁之文其嫁女之家甚有破產以營
奩飾者故民間生女多不舉雖厲禁不盡除也 門李志同

案州人婚禮先納吉

俗謂之押懇

次納徵

俗謂之過禮

於家禮

亦不盡背至親迎今人已鮮行之者不獨桐川爲然也惟溺女舊有此風詢之州人大半亟望生男者爲之未必預爲奩飾計要皆不仁之甚者屢經前守嚴禁且設育嬰堂以收棄孩溺女之風亦已衰息若破產營奩當時容或有之今雖寒素家女必用髹漆雕鏤牀此亦他處所無也

婚日婿家裝綵轎轎中置脂粉羅帕祿衣等物轎門綴以篩鏡婦人具茗果致拜謂之祭轎轎至女家亦如之祭

廣德州志

卷二十四

風俗

十一

畢持鏡帕至女室女遽昏暈遂以帕蒙其首篩鏡蔽其面爲沐浴衣飾傅脂粉納轎中皆保姆抱持之女不知也亦有傅粉後始暈者轎行里許送者共喚女或吹銅角以驚之且行且喚待其醒而後反謂之暈轎此俗獨州有之越境卽否或云祭轎舊用酒暈益久因代以茗乾隆三十五年前守恒聞其事謂爲妖禁之不改竊謂祭轎非禮也古遠行始有祖道之祭嫁娶不越境安用祭爲況車輿何神禮垂御輪不聞祭轎欲止妖俗當革

淫祀

婚夕戚友送房年長者以果撒帳唱撒帳詞畢酌酒揖新郎勸飲又以酒揖新婦屬保姆勸之長少次第進勸郎婦醉而後已謂之炒房此俗近二三十年間始有之雖不至如抱樸子所云戲婦法然酒客酗醬不知限斷則汝南杜士之事安知不再見於今戚友齒尊者遇有此等自當正言戒禁顧反爲之倡導耶抱樸子謂當加以峻刑不爲過也

楊志喪禮無定制稱家有無惟崇尚浮屠相沿不改**案**浮屠之教惑人以懺悔解脫猶可言也近乃編造佛曲鐘

廣德州志

卷二十四

風俗

十二

鈹之中雜以絃管哀死之時淫哇聒耳爲傷風敗教之最甚急宜厲禁

楊志葬事酷信形家之說泥忌陰陽致有暴露不葬者希獲福求吉地往往因而構隙故州之訟事惟墳山爲多

楊志州人率行宗法族各立長設有祭田族長視族之窮老疾病婚喪無出者助給焉**案**祭田多而資有餘者取以周恤之其祀自

高曾以上有至數十世之始祖者每春秋合享萃老稚於廟中而餒其餘又各有家譜以稽統系**案**譜約三十年一修族繁

者或二十年一修子孫不肖則削其名其追叙世系率以多爲貴有至四五十世者固屬敦本之意然事無左

證恐反滋僞撰之弊
有識者不可不知也

李志其子孫有不才者不許入祠
謂之革祭

祭田之外又有學田入學者分其租應試者助以費有登
賢書上春官者則一歲所入悉資給之故族規之善者
雖貧士不患貧焉

楊志民間宴會不尚豐腆肴核數筮賓主結歡而已

案近人宴客強半以豐腆相高視昔所稱殊有異已
程大昌演繁露湖州人事廣德張王不食猪肉言張王曾
現身爲猪故并剛鬣一牲避之不敢以祭亦不敢食陸

廣德州志

卷二十四

風俗

十三

德明曰鯀爲黃熊東海人祭禹廟不用熊白及鼈亦此
意也

案州人奉神最重祠山有不食猪肉者謂之吃祠山
齋濮陽模有祠山化豕辯謂好事者因淮南子禹化
熊治水事而附會之又云相傳北斗變形爲猪唐僧
一行於渾天寺掩獲羣豕而北斗遂隱明徐武功奉
斗合家不食豕肉及得罪當決忽大風雷電有物如
豕者七蹲錦衣堂上因得赦張眞君以禮斗得道至
今橫山有禮斗臺然則今之不食豕肉亦奉眞君所

奉之斗齋耳

居人不論大家小戶皆有浴室男女老少夜必澡洗寒暑無間案吳興掌故集風土類云山中有此不但薪水易給亦資澡水肥田也其浴冬月坐火箱曉起衣着及暮夜臥被必出其中易有鬱熱得水氣散之故少大病桐川密邇湖郡俗多相似云

建平存稿縣距金陵毘陵宣城各三四百里人不見紛華靡麗率皆安土重遷習勤守樸士無囂浮之習民無失業之人書役並治生產雖趨事拙而奉法謹鄉人不能

廣德州志

卷二十四

風俗

十四

商賈皆服田力穡終歲麤衣糲食女勤紡績無綾羅簪珥之飾盛暑亦布衣不絺綌紳士鮮紈綺者蓋藏之家屋無丹雘什器疏惡男不爲人僕女不爲人妾鄉間或數十里無屠肆深山之人有老死未入城市者澹和之氣未澆未散此風俗之美也然而士澹而不足於文民勞而不足於蓄其俗之尤敝者莫甚於淫祠五猖七女之屬暮布星羅迎神賽會趕集開場無月不有神會渠率指名科斂賽會之日發屋伐樹莫之敢止

分流廟向有此習

趕集則彌日連夕會內神器錢債上下交代稍有不

羣坐逼迫疾不信醫而信巫禱祀齋醮不惜所費苟禁絕淫祀之費藏富於民可禦凶歲轉無益之費延師訓子則人知禮義而文教之鬱興也有日矣

案諸舊州志俱稱建平風俗與本州同卽縣志所載亦無異詞此貢令所言較志更詳雖但指卽俗而言而本州亦未甚相遠卽如桐民耕讀爲業勤儉自如貧不爲僕妾富不畜奴婢客至以子弟供使令其淳樸固從同也至信鬼佞神祠雖不至如貢所云之侈靡然輪值會首迎神至家祭賽浹旬積習相沿亦尙

不免聞更有崇奉一金臉寶藏交代者誠能以貢令所言共相覺悟一遵乎聖人務民義遠鬼神之訓則此邦近古茂美之風有不大啟其文物聲明之盛者耶

以上胡志案同治以後土著少客民多來自湖南湖北及河南浙東皖北等處相錯雜糅其中淳良敦樸者固多而桀傲者亦有風俗澆漓一時難化冀有賢令尹威德並濟鋤莠扶良庶強暴之風少戢耳

節序 附

節序一目始於楊志門李及縣志均無增損今仍據楊志而以觀聞所及者益之

楊志立春前二日城內各坊以金翠繡綺飾兒童裝扮故事加帷幙眾舁之集天壽寺俟贊廳點閱曰演春 案今其事

已廢次日綵仗鼓吹各官至東郊演武廳導勾芒土牛入

城童叟聚觀視土牛形色以占水旱高下宜種勾芒鞋帽以卜忙閒各官宴畢復作鮑老狻猊諸伎 案今宴即在演武廳

鮑老亦存其意而已次日黎明鞭春如制

廣德州志

卷二十四 節序

楊志元日黎明長幼悉正衣冠拜神潔祀祖禰進拜尊長視歲吉所向拈香神廟曰蹈喜

楊志人日以陰晴占禳祥 案田家五行以一雞二犬三猪四羊五牛六馬七人八穀九荳

十棉花十日皆宜晴而人為重故俗於此日占之或為綵勝以邀吉穀日以陰

晴卜歲之豐歉

楊志上元設燈綴以五綵張於衢鼓吹其下兒童射謎為嬉十六日城南竹馬高四丈許 案各處神祠社廟悉皆掛燈祝歲有騎竹馬出行者其高以小東鄉小圩保及八保廟為最馬足至三丈六尺以二長木為之騎者先

繫馬頭尾於腹背登樹顛縛其足於木杪手扶竹竿而
起人代舉其木以行或遇驟風或舉者失手則傾跌致
死聞舊曾傷人而其風不息蓋神會中飼以酒肉更釀
錢與之故貪利無賴之人不惜身命爲之前守李示禁
而未能革也

田家五行二月八日爲桐江張王生日前後必有風雨俗
云請客風送客雨正日謂之洗街雨初十日謂之洗廚
雨案俗謂有風雨及微雪者謂之做生日主歲又云祠
豐是日多寒故諺云二月初八凍魚凍肉

山誕辰東南風謂之上山旗主水西北風謂之下山旗

廣德州志

卷二十四

節序

十七

主旱以是日必有風雨故俗號云云案州人又謂祠山
誕辰係二月十一日故遠近進香之人自初八日爲始
紛逕而來過二十日始漸止而尤盛於十一日

楊志春社日祀社以祈有年花朝士女踏青

上巳日士女各簪薺菜花案楊志稱士女臨溪浣濯效
古修禊事今已無之故不錄

楊志清明日掃先塋祭祖廟案是日家家插柳枝於門老
幼首簪嫩柳族姓各以紙錢繫祖禰之墓設酒饌用鼓
樂迎導至墓以次羅拜名曰標祭亦曰飄祭分給子孫
烘餅謂之清明餅旣歸復祭於宗祠萃老幼而共餽其

餘謂之吃清明又各備牲醪祀神以粉作虎列其間祭畢以刀剖虎謂之退白虎

楊志四月八日寺院以香水浴佛設供家製青精飯

案州有樹

其葉可染米名曰黑飯樹卽南燭也居人於是日造黑飯互相饋遺南燭詳物產

州人以四月十五日爲城隍生日市人迎賽遞歷四城四日而偏優人演劇或至匝月

楊志午日戴艾虎懸朱符繫綵絲於臂爲長命縷角黍相餉屑菖蒲泛雄黃酒以辟五毒

六月六日神會有袍者出曝之仍設牲醪以祭

廣德州志

卷二十四

節序

十八

楊志七夕曝書辟蠹夜設瓜果於庭穿針乞巧

楊志中元祀先寺院設盂蘭盆會案是日農人以牲醪祀田公地母於田畔

中秋以月餅相餉欲子者於此夕乘月摘南瓜爲夢熊之兆併有摘得瓜用鼓吹爆竹以送姻戚者

楊志重九祀祖禰於家廟採菜萸製蓬餌攜酒登高

十月晦日以糯米作糍團供神并餉姻戚

楊志長至日官民俱相賀案是日祀先

楊志臘八日百果和米作粥

案各寺院爲之

楊志小除日家祀竈神置細草蒸菽爲竈神芻馬案今俗謂臘月二十四日竈神上天或先一日或本日設粉團糕餉祀之又剪草撒豆於空中以飼神馬謂之送竈

楊志除日徧饗諸神男女坐而待漏曰守歲夜爆竹達旦案是夕陳設粉團糕果祀竈神謂之接竈家懸先世遺像祭之

建平縣節序同

